



職方典第三百四卷

太原府部藝文一

晉祠銘

并序

唐太宗

夫興邦建國資懿親以作輔分珪錫社實茂德之攸居非親無以降基非德無以啟化是知功俾分
陝奕葉之慶彌彰道洽留棠傳芳之迹斯在惟神誕靈周室降德鄴都疏派天潢分枝璇極經仁緯
義履順居貞揭日月以爲躬麗高明之質括蒼溟而爲量體弘潤之資德乃民宗望惟國範故能協
降鼎祚贊七百之洪基光啟維城開一匡之霸業旣而今古革運陵谷潛遷雖地盡三分而餘風未
泯世移千祀而遺烈猶存元化曠而無名神理幽而靡究故歆祠利禱若存若亡濟世匡民如顯如
晦臨汾川而降祉構仁知以棲神金闕九層鄙蓬萊之已陋玉樓千仞恥崑閼之非奇落月低于桂
筵流星起于珠樹若夫崇山互峙作鎮參墟襟帶邊方標臨朔土懸崖百丈蔽日虧紅絕嶺萬尋橫
天聳翠霞無機而散錦峯非水而開蓮石鏡流輝孤巖霄朗松蘿曳影重谿晝昏碧霧紫煙鬱古今
之色元霜絳雪皎冬夏之光其施惠也則和風溽露是生油雲膏雨斯起其至仁也則電裳鶴蓋息

焉飛禽走獸依焉其剛節也則治亂不改其形寒暑莫移其操其大量也則育萬物而不倦資四方而靡窮故以衆美攸歸明祇是宅豈如羅浮之島投嶺南遷舞陽之山移基北轉夫以挺秀之質而無居常之資故依靈岳以標奇託神威而爲固加以飛泉涌砌激石分湍縈氛霧而終清有英俊之貞操住方圓以成像體聖賢之屈伸日注不窮類芳猷之無絕年傾不溢同上德之誠盈陰澗懷冰春留冬鏡陽巖引溜冬結春苔非疏勒之可方豈瀑布之能擬至如濁涇清渭歲歲同流碧海黃河時時一變夫括地之紀橫天之源不能澤其常莫能殊其操信乃茲泉之表異帶仙宇而爲珍仰神居之肅清想徽音其如是在是以朱輪華轂接軫於壇衢玉幣豐粢連箱于廟闕氤氲靈氣仰之而彌高昭晰神光望之而逾肅潛通元化不爽于錙銖感應明徵有逾於影響惟賢是輔非黍稷之爲馨惟德是依豈簞簋之爲惠昔有隋昏季綱紀崩淪四海騰波三光戢耀先皇襲千齡之徽號膺八百之先期用竭誠心以祈嘉福爰初鞠旅發跡神祠舉風電以長驅籠天地而遐掩一戎大定六合爲家雖膺籙受圖彰於天命而克昌洪業實賴神功故知茫茫萬頃必俟雲雨之澤鬼鬼五岳必延塵壤之資雖九穗登年由乎播種千尋聳日本藉崇基然而不雲不雨則有炎枯之害非塵非壤則有

傾覆之憂雖立本於自然亦成功而假助豈大寶之獨運不資靈福者乎故無言不酬無德不報所以巡往跡賽洪恩臨汾水而濯心仰靈壇而肅志若夫照車十二臨城三五幣帛雲委珍羞山積此乃庸鄙是享恐非明神所歆正當竭麗水之金勒芳猷於不朽盡荆山之玉鑲美德于無窮召彼雨師弘茲惠澤命斯風伯揚此清塵使地祇仰德於金門山靈受化于元闕括九仙而警衛擁百神以前驅俾洪威振于六幽令譽光於千載豈若高唐之廟空號朝雲陳倉之祠虛傳夜影式刊芳烈乃作銘云赫赫宗周明明哲輔誕靈降德承文繼武啟慶留名剪桐頒土逸翮孤映清飈自舉藩屏惟靈邦家攸序傳輝竹帛降臨汾晉惟德是輔惟賢是順不罰而威不言而信元化潛流洪恩遐振沉清廟肅肅靈壇松低羽蓋雲掛仙冠霧筵宵碧霞帳晨丹戶花冬桂庭芳夏蘭代移神久地古林殘泉湧湍縈瀉砌分庭非撓可濁非澄自清地斜文直澗曲流平翻霞散錦倒日澄明冰開一鏡風激千聲既瞻清潔載想忠貞濯茲塵穢瑩此心靈猗歟勝地偉哉靈異日月有窮英聲不匱天地可極神威靡墜萬代千齡芳猷永嗣

并州新修廟學記

宋韓琦

三才各有主四時大運主於天萬物大生主於地人倫大化主於夫子夫子道何主曰主其中者也然天地之主或不能常焉而吾夫子之主雖終天地而不變也凡爲人君爲人臣爲人子者能勉而及吾夫子之主則其國治焉其身安焉雖天地之主有時而戾固無預乎吾家所及然則人之道孰先於吾夫子哉有天下國家者不知其本乎先儒稱夫子者多矣獨杜牧之謂自古稱夫子之德莫如孟子稱夫子之尊莫如韓吏部蓋言堯舜莫賢其德而社稷莫加其尊誠哉後之學者雖欲極言而尊大之又孰加焉惟郡縣守長德施其教者能興學以恢其德崇廟以稱其尊斯可以達其本者也太平興國四年太宗皇帝平僞劉一天下壞太原故城徙州榆次又三年復遷於唐明當時經始者乘用武之後弗慮及遠不知併據都會異日爲一道之本凡城隍官府門戶衢陌之制一從苟簡不中程度視夫子之廟尤爲不急置城之東南隅體陋而削僅有祠所景祐中康靖李公若谷者卽廟建學得賜田贍學徒而人始樂教慶曆初文烈明公鎬又建禮堂於夫子之殿北而講始有容然皆因仍故基地愈逼隘其後生員寢廣至圻東西序所圖諸弟子室而處之二時釋奠三獻從祀官與學生執事者不能徧立於庭半立廟門之外皇祐五年春某忝被州寄受署來謁知

於禮之瀆而未遑改作始奏隰州司戶叅軍牛景充教授以專學職明年秋大穰民安事簡於是馳使東魯得仙源廟圖像冠服之實賈民廟北地命崇儀使併代州營內兵馬鈐轄張僕古侍禁兵馬監押王守思集工視役撤其舊而一新之然後廣殿耽然而雄睥容儼然而尊顏氏以降諸弟子孟氏以降諸大儒或像而侍或圖而列次序於堂廡之間煥然大備復徙廟東州兵之居以置學南書樓北講堂東西齋舍廟學異門又設射墦於廟學之間以備男子之習至於起居飲食之事必嚴其所俾稱是焉自始事底訖功凡度材治基逮塗茨丹牖之細一須官用無及民者夫廟學之新其於爲治之道竊有志達其本者而諸生其達學之本乎飾公齋萃公書潔公食日授經月課文昧其教者荀曰此欲吾藝之精取進士科富且貴而已噫如是則吾學教人竊祿之地非有望于諸生也夫精藝而求仕末也得仕而行道本也然不由其末則不得施其本故由末而仕其末不可用而本或不存焉非竊祿何哉且晉之俗唐虞氏之俗也吾夫子之道二帝三王之道也豈習俗之易而習道之難哉蓋習俗易者其法傳習道難者其學廢今學興矣處吾學者其務外勤於藝而內志於道一旦由茲而仕也則思以其道爲陶唐氏之臣心陶唐乎其君心陶唐乎其民能如是吾始謂之達其

本至和元年月日記

思鳳亭記

文彥博

楊盈川所居廨舍好治亭榭其榜額皆制美名大爲遠近所笑夫考室命名者衆矣或卽其地號而著或因其事實而稱揭而書之斯用無愧苟異於是則徒豐其額美其名必爲有識者之撫掌天聖庚午歲九月七日彥博受命宰榆次越明年春正月四日始到官邑之生齒受地而附籍者五萬二千戶喬居而末業者不與焉河東之邑斯最爲大噴言控訴庭無虛日敏政者蒞之猶憚弗及顧予菲劣豈敢逸豫蓋夙夜而在公者迄三時矣未窺園圃歲聿云暮適西成告豐而邑中之園亭得以觀覽縣令表位之南舊有小園頽廢已甚乃榮垣薙草惟塗暨茨無變本而增華但踵故而加飾亦旣成室必也命名可書者有三而思鳳是其一也詢于父老之口質以往圖之載皆曰荀浪嘗宰是邑治有善迹鳳集其境後人思之乃用名鄉今縣南有荀政鄉焉愚謂賢宰之迹未可遽泯因扁是亭曰思鳳所謂卽地號而著因事實而稱者斯得之矣自是居是亭者誠能修荀公之政致祥禽之集則後之人思之亦如今之思荀公者矣詩曰荀令吟琴地吁嗟集鳳兮想同桑雉擾應並棘鸛栖

承乏今無敢思賢古若稽我來求舊址卽署改親題不獨懷希驥聊將警割雞一闌循吏表芳躅愧攀躋明道五年二月四日

太原府學文廟記

金趙風

自虞夏殷周設國學之法以養天下士取以備百執事之選故能卒相治功漢魏以降學校聿興而名士輩出然則取士雖非一途而學校得人爲多故天下不可一日無學校也信矣太原自周秦隋唐以來控扼西北皆爲重鎮分虎符者例皆修障隧飭戈矛以捍患禦侮爲事何暇議學校乎我皇朝應天順人蕩海平嶽教燭窮隩威震荒遐六七十年間無犬吠之警今之太原遂爲內地府舊有學罹兵革之後蕩毀無餘至天會九年耶律公資讓來帥是邦嘆館弗修但取故宮舍餘材以成之正隆初完顏宗憲爲尹稍加繕完大定丙午張公子衍爲亞尹楊公伯元爲漕貳二公以殿宇卑隘立建賢堂於兩廡間制度蓋未廣也聖上嗣復大政宗儒尙文明昌二年以前中都路都轉運使張公大節出尹太原太原于公爲鄉郡故尤以宣布教條率勵風俗爲己任始至首謁先師見其棟宇卑陋階廡狼藉喟然嘆曰是足以上副皇朝右文之意乎乃量工命日撤故就新始自大殿重加整

飾周以翠雲華而不侈考禮爲宜因中門兩翼構爲外舍各三楹分六齋又建大堂於建賢堂之南
儼雅清潔望之生敬故講堂去殿不數步無階陞可以降升闔翳迫隘不堪其陋今北選二十步有
奇隆基三尺餘高壯偉麗與大殿相輝映復構屋十楹左右爲齋十六稍南又各建六楹分八齋及
外齋總三十楹講堂之後提學教授正錄之位序咸在焉講堂談經既有堂與齋矣儲粟藏書既有
庫矣飲神有庖祭祀有器秀茂之士其志如歸公乃詣學召集諸生諄諄勸誘不啻如賢父兄之切
至也是年登龍飛榜者學籍凡七人翰林應春王澤首冠多士先是公持橫海節亦時修飾學宮督
學儒業學生徐遵是舉遂魁天下并滄皆古名鎮以學校之廢故久無登科者一旦興學二人繼成
大名則知張公教養之勤豈非其效驗耶嗚乎農夫耕腴其獲也必豐商賈資厚其利也必倍不耕
而無資其求也必無獲今夫巍冠博帶廣袂之衣傲然游其中者雖有瑰傑之才苟無學術以濟之
其將何獲要之士貴業之勤而志之篤也方今貢舉之法旣取詩賦以振天下英雄之氣又談經義
以傳先哲淵源之學使放蕩者退而有所拘空疎者望而不敢進其所以籠天下之俊造無所遺矣
士生此時可謂厚幸諸公業精于勤他日登巍科行所學光明秀傑輝耀士林以取卿相者足以爲

張公之榮矣不究其本根肆其懈惰望洋而歎目崖而返進不能取科名以經世退不能抱仁義以勵俗皆張公之罪人也乃叙其梗槩以告來者使勉于學以副張公責望之意

烈石祠禱雨記

明于謙

陰陽不測之謂神真實無妄之謂誠誠爲神之實體神爲誠之妙用故有其誠則有其神無其誠則無其神斷斷乎其不可誣也然神之靈不一有因山川毓秀人心景慕而靈者名山大川能出雲雨以利天下者是已有生立名節歿享血食而靈者古之忠臣烈士載在祀典而能利國家庇民者是已要皆以誠感之而後有以致其靈不然則幽顯之間漠然而不相通矣宣德癸丑歲自春徂夏山西閩境不雨衆咸以歲事爲憂欽差鎮守山西都督李公謙詢於部使者及藩臬諸公若郡邑吏涓吉備禮齋沐致禱于都城西北之烈石祠祠爲趙簡子臣竇鳴犢血食之所屢著靈驗而爲郡人所宗其地山川環抱大樹蒼鬱朝雲暮靄恆出於檐楹棟宇間祠之右有靈池源浚發澄波滉漾穹甲巨鱗出沒于天光雲影中隱顯恍惚若有神以憑之者嘗致禱之初靈風振衣微靄觸石而光景爲之漸伏神之聽之若響若答比旋車而雲陰四垂雷電交作甘霖誕降若六丁挽天瓢而下注之沛

然莫之能禦於是焦者以沃仆者以起凡昔之憔悴而顛蹙者舉欣欣而有喜色矣是雖神之靈亦誠意之所感也諸公將立石以昭神貺會予奉命出撫河南山西而弭節太原遂屬筆于予惟神之遺烈載在信史而無庸書惟聖朝深恤民隱故居官者咸以救災恤患爲念匪神之靈亦安能轉亢旱而爲豐稔也哉受神之賜旌于石以報之禮也乃著其感應而復爲之銘銘曰有翼者祠峙于西北厥神之靈旣顯而赫生著英烈死享廟食歲惟亢旱民憂菜色有嘉闔帥特用憫惻詢謀僉同臬司方伯齋沐致虔罔不精白致禱於神神應靡貳如問而答如求而得元雲構陰爰降甘澤以慰士女以潤稼穡病者以甦愁者以懌降福稔稔曷其有極神不我違敢稽報德樹石廟門表表奕奕自今伊始神人咸適歲獲豐稔民遂生殖桑盛修潔以享以格永戴神庥萬古無斁

烈士廟記

李濂

余讀遷史至程嬰公孫杵臼之事及左氏所紀提彌明鉏麇之死靈輒之亡與韓獻子啟景公立孤之言未嘗不掩卷而悲引袂雪涕而泣下不已也嘉靖癸未秋余巡郡邑至忻之九原夫九原者晉卿大夫之葬域趙宣孟之田邑也世家謂趙孤復立得其田邑如故檀弓國語並載趙文子與叔向

觀乎九原蓋卽此地云余駐馬遲回詢程嬰杵曰韓厥諸墓父老曰鉏魋受命于公而賊宣孟者也
提彌明車右也靈輒翳桑之餓人也觸槐搏斃接踵死焉倒戟報食不告亡焉皆感宣孟之義而奮
不顧身不可不謂之難也宜合祀之於是貌宣子於中而厥嬰杵曰彌明靈輒咸配食蓋合祀禮也
先宣子主也次獻子貴也次嬰杵功也次彌明靈輒推及其烈也春秋饗之思也廟曰烈士悼也廟
既余作迎送神二章教忤人于饗祀之日婆娑歌舞以樂神而并刻之石其辭曰維瑤瑟兮拊鼓巫
緩節兮應舞神之來兮前素旗紛玉佩兮光陸離風颯颯兮淒其若有言兮傷悲曰遭時兮匪昌匪
諸良兮疇襄聯虬駟兮徜徉澹忘歸兮樂故鄉睨九原兮晉疆相顧歔歔兮涕泗浪浪終獻兮徹俎
停律兮降羽靈濟濟兮既歆焱去我兮何所太行委蛇兮滹沱東流吁嗟此邦兮神之樂丘春芳菲
兮秋黍胡不留兮容與陵谷變兮時代移遠有塚兮近有祠英風萬祀兮在茲況我氓兮承思

晉祁大夫祠記

張松

始張子既拜祁縣之命因喜曰夫祁非晉大夫奚之封土耶昔大夫內舉不避親予不敢作私好焉
大夫外舉不避讎予不敢作私惡焉予于是乎得師予仰而觀法焉知所以知祁矣迨至則訪大夫

之遺而瞻禮焉世遠蹟蕪漫不可識卽有意於祠祀而力未能也旣而議毀淫祠見西郭而東向有觀音堂者退而自計祀淫匪彝墮城匪儉典章將墜民是用戕迺下教曰其以故觀音堂改祀奚其以祁牛羊舌赤左右配或問狐曰大夫之讎也其去之或問大夫而讐狐也奚爲而舉也張子曰夫子于是而後知公私之道判也大夫告老舉子舉讎未之前聞也非大夫之公爾忘私以人事主誰能若是是晉之所以昌乎充是義也雖不見叔向而歸叔向亦不告免焉而朝解狐之感固深矣故舉其讎以爲相讎往拜謝狐引弓迎而射之曰吾不能以私怨壅子於吾君奚拜且謝爲也又舉荆伯柳爲上黨守柳往謝之曰幸釋罪敢不再拜曰舉子公也怨子私也子往矣吾怨子矣以是知狐之不欲見其讎與柳也猶大夫之不欲見狐也晉厲之末文公之餘威替矣子周之立也少大夫舉善下皆效之當是時也私怨不入公門是故赫焉霸焉用天下之大履全盛之時而舉數如大夫蕩蕩平平之道當且復見是足爲相天下者之規獨縣令所宜觀法也哉是祠之立誠不可後遂用爲記

自逾太行迤北抵雲中恆岳盤其東大河壑其西環地數千里介乎周秦燕趙之間者晉之故疆而
今天子以封諸王所謂山西者也屬府州邑百餘計觀其山川之雄邃風氣之繇厚城郭之堅完原
隰之沃衍有因高節夷固外宅中之勢蓋太原爲第一郡故國都所建藩省所治武衛風紀所司咸
於是乎在宜不與他郡等朝廷往往擇所守率難其人洪武五年秋山西省以守臣闕狀聞詔以朝
列大夫同知平陽府事淮西胡公維進階中順大夫知是府始公之至以清謹端正爲治軌吏民于
大法剔蠹蒐弊離紛決壅處以笑談不數月政以和上官莫不嘉之公惟府治之廢也久矣托署他
所地偏屋卑不卽爲圖苟新厥觀於我國制謂何乃諏於衆衆曰宜遂營於省治之西百步許辨方
正位面通衢背崇墉拓基聚材百工偕作始於是年之某月明年某月告成聽政有堂退思有室推
轍有廳賓屬有幕廡分六曹門設重扃與夫廨地倉庫典獄之所一如制式氣象聿新過者竦然若
嘖嘖不舍去五月某日公移署新治而僚佐賓屬及郡有司邦人士凡執事者交賀畢合樂以饗于
庭公若曰噫來汝衆予承天子命牧此邦三州十九縣之人人之利害休戚懸於予予敢不祇慎乃
心以荷天寵以敷宣聖天子德化而與若等事事乎予誓自今凡我在位君子洎若等入斯門行斯

庭以登斯堂者其尙洗厥心新厥德毋忘天民毋替天職毋苟天祿敬念哉一或從欲以敗厥度藉令脫咎殃于身獨不上畏於天而下辱斯地乎衆唯唯而退皆相勵自慎且願立石以著公績示永久爰屬記從事某竊惟皇帝旣新厥命以禮樂教化陶夫民守令于民爲最親故新民之效責守令此宜公于創新治宇之初諄諄然誠於衆其將去舊以卽新新其德以新教化新教化以新民俗豈若務新耳目之觀聽氣體之居養者而然哉民俗旣新其無負聖天子責任之重矣山西諸郡抑不有聞風而興起者歟吁今之爲牧伯得如公落落百數輩參錯天下皆用心若是何愧乎古良二千石乎故予不辭而爲之記若夫歷代之郡號官秩部屬疆理廢置沿革則有郡乘在尙俟來者攷諸

適晉紀行

王世貞

余以庚午六月起於家過大江北道齊魯歷汴抵衛出修武發寧郭驛三十里抵清化鎮山西之治器集焉渡清河田禾益茂嘉樹蓊鬱居人引泉水爲長溝以灌有水碓水磨之屬午飯萬善驛四旁栽白楊蕭蕭悲風殊益人旅愴乃知少府齋中之不易也自是始入太行亦不甚險惡昇夫魚貫而上久之以爲絕頂矣乃復有山障之愈上愈不窮至碗子城爲豫并界兩山相對數十百丈巨壑陡

絕無底中爲嶺道石梁如玉雪又復數嶺回顧中原愴無盡平楚鬱鬱紛吐蒼翠日色與雲氣爭長俄而雲縑繞數十里中互其半狂風驟發萬竅怒號食頃雨亦隨至誦唐人三晉河山皆北向二陵風雨自東來語宛然若畫爲小憩民居久之以迫暝強發上下峻坂泥滑馬足鑿落與人趾錯先後甚窘抵星輶驛初鼓盡矣是夕涼甚五鼓不成寐初九日黎明冒雨發道有古祠刻石崖表曰孔子廻車處按趙殺竇鳴犢孔子臨河而返此去河遠蓋傳會語也泥濘益甚未抵澤州飯太行驛道始平得一小舒暝抵樵村驛復小雨夜涼如前夕黎明復冒雨發晨飯高平午後飯長平驛卽秦白起坑趙卒四十萬人處也問居人不能指其所第云傍村人鋤地尙得銅鏃如綠玉按自此而北爲長子以至晉陽皆趙地趙旣築甬道秦何以得絕之趙卒四十萬人爲二萬五千騎中斷不能併力合而爲一又不能選五萬精騎擊秦絕甬道軍卽糧垂絕當以死激士心決鬪猶可庶幾萬一因循至於飢相食十五五不能軍而始出罷士身搏戰不亦晚乎且秦王尙自至河內發男子十五以上絕甬道而趙王不能發晉陽邯鄲未冠者與之角何秦之巧而趙之拙也前後四十五萬人命馮亭始之而成之者平原君馬服君子耳過長平爲丹嶺復上下險阻可三十里而稍平暝復小雨抵

長子縣趙襄子所不欲走地也卽險當亦不如晉陽毋論繭絲也十一日五鼓發會潞安王守宮用
來謁少止午飯余吾驛復陟高嶺至數重四望皆山雲日映帶如萬玉雉疊嶂高低作銀海衝濤決
排狀已黑雲從東南至大雨驟降道路幾絕嶢峩輕輿中下見數足蹢躅旁皆絕壑乃知浮滄海汎
長江車太行道以危身借快目不易也薄暝渡漳河宿褫亭驛十二日凌晨發午飯沁州又四十里
小憩鋪舍大雨忽復作轉入深谷中兩旁皆峭壁中通澗道雨益甚飛瀑爭懸崖而下聲如轟雷又
似蒼虬吐鬚靈欲搏人車馬濺濕澗道水暴發昇夫股栗計別取高嶺箭括一門十步九退時時行
絕磴間陽壁直上不可捫陰壑數十百丈大約如蜀中左擔山而高下陡急不可狀壁間飛流時時
絕道竭力爭而度久之抵一鋪且暝矣衆前白更十五里爲西塘河驟漲不易涉也顧視鋪室皆已
傾無所不受雨而民居僅土穴數家不能容幸雨小霽乃決筴棄行李挾其人使佐昇東嶺而前凡
數渡水始抵西塘河河流砰湃礧砢若擊數千金鉦洶湧衝突目不可正視麾導騎試之馬足雖陵
蹶然不能踰腹因賈昇者勇亂流謹呼擁而渡相慶且脫險矣行里許復逶迤攀高嶺其峻陜視前
更倍雨復奇作東嶺皆滅昇夫固衆然不能以左右輔輿第號呼昇者使自力而已勉上輒前陪下